

白樂天文集卷之二十一

浙東觀察使元稹微之纂集
太保武定侯鳳陽郭勛重編

判五十道

得甲去妻後妻犯罪請用子蔭贖罪甲怒不許

二姓好合義有時絕三年生育恩不可遺鳳雖阻於
和鳴烏豈忘於返哺旋觀鴛偶遠抵明刑王吉去妻
斷絃未續孔氏出母踈網將加誠鞠養之可思何患

難之不救况不安爾室盡孝猶慰母心薄送我畿贖
罪寧辭子蔭縱下山之有怒曷陟岵之無情想采芣
之歌且聞樂有其子念葛藟之義豈不忍庇于根難
抑其辭請敦不匱

得辛氏夫遇盜而死遂求救盜者而為之妻
或責其失貞行之節不伏

親以恩成有讐寧捨嫁則義絕雖報奚為辛氏姑務
雪寃靡思違禮勵釋憾之志將珍灌蒲蓄許嫁之心
則卑松竹况居喪未卒改適無文荀失節於未亡雖

復仇而何有夫讐不報未足為非婦道有虧誠宜自
恥詩著靡他之誓百代可知禮垂不嫁之文一言以
蔽無效尤於邾婦庶繼美於恭姜

得乙與丁俱應拔萃乙則趨時以成名丁則
勤學以待命牙有相非未知孰是

立已徇名則由進取修身俟命寧在躁求智乎雖不
失時仁者豈宜棄本屬科懸拔萃才選出群勤苦修
辭乙不能也吹噓附勢丁亦恥之躁靜既殊性習遂
遠各從所好爾由徑而方行難強不能吾捨道而奚

適觀得失之路或似由人推通塞之門誠應在命所
宜勵志焉用趨時若棄以菲葑失則自求諸已儻中
其正鵠得亦不愧於人無尚苟求蓋嘉自致

得丁冒名事發法司準法科罪節度使奏丁
在官有美政請免罪授真以勸能者法司以
亂法不許

宥則利淫誅則傷善失人猶可壞法實難丁僭濫為
心黽從事始假名而作偽咎則自貽終勵節而為
官政將何取節使以功惟補過請欲勸能憲司以仁

不患姦議難亂紀制宜經久理貴從長見小善而必
求材雖苟得踰大防而不禁弊將若何濟時不在於
一夫守法宜遵乎三尺盡懲行詐分詐拜真

得乙上封請永不用赦之理云廢赦何以使
人自新乙云數赦則姦生惡弊轉甚

刑乃天威赦惟王澤予以御下仁乎建中上封以宥
過利淫倖門宜閉大理以盪邪除舊權道當行皆推
濟國之誠未達隨時之義何則政包寬猛法有弛張
習以生常則起為姦之弊廢而不用何成作解之恩

請思砭石之言兼詠蓼蕭之什數則不可無之亦難
得景居喪年老毀瘠或非其過禮景云哀情

所鍾

孝乃行先則當銜恤子為親後安可危身景喪則未
終老其將至懷荼蓼之襲誠合盡哀迫桑榆之光豈
宜致毀所以爰資肉食唯服麻練况血氣之既衰老
夫老矣縱哀情之罔極吾子思之苟滅性而不勝則
傷生而非孝因殺立節庶畢三年之喪順變從宜無
及一朝之患既虧念始當愧或非

得幸奉使遇昆弟之仇不聞而過為友人責
辭云銜君命

居兄之仇避為不悌銜君之命聞則非忠將滅私而
奉公宜弃小而取大幸時惟奉使出乃遇讐斷手之
痛不忘誠難共國飲冰之命未復安可害公節以忠
全情由禮抑未失使臣之體何速諍友之規史駢立
言嘗聞之矣子夏有問而忘諸乎是謂盡忠于何致
責

聞軍帥選將多用文儒士兵部詰其無武藝

帥云取其謀也

忘身死節誠重武夫制敵伐謀則先儒士將籌策而
可尚矣騎射之足稱軍師明以知兵精於選將以為
彎弧學劍用無出於一夫悅禮敦詩道可弘於七德
功宜保大理貴從長若王師之有征以謀則可苟戎
略之無取雖藝何為况晉謀中軍選於義府漢求上
將舉在儒流豈惟我武惟揚誠亦斯文不墜元戎舉
德朱爽能軍兵部執言恐為辱國

得甲至華嶽廟不禱而過或非其禮與

禱非禮也

嶽則配天自修常事神雖福善安可苟求宜率道以
去邪豈從衆而失正甲志惟守義言乃合經以為視
以三公實天子之所饗降其百禮寧匹夫之可禳如
脩蘋藻之誠是用糝稗之禮况人之僭濫徒欲乞靈
而神實聰明豈歆淫祀非鬼是為誦也黷神無乃吐
之旅於泰山古猶致誦禱于華嶽今豈不非諒正直
之難誣雖馨香而勿用將勸來者所宜救歟

得乙隱居徵辟不起子孫請以所辟官用蔭

所司不許

修身遜世寵則可驚制爵尊賢命其難廢形雖遺於軒冕澤宜及於子孫乙貞以自居辟而不起鶴書莫顧雖忘恤後之心爵命已行寧闕賞延之典若使死無用蔭生不及榮何成旌善之風且是廢君之命場苗不食誠自絕於繫維葛藟有陰義難虧於燕翼請優後嗣以獎外臣

得江南諸州送庸調四月至上都戶部科其違限訴云冬月運水淺故不及春至

賦納過時必先問罪流阻有故亦可徵辭月既及於正陽事宜歸於宰旅屏如澤國盍納地征歲有入貢之程敢忘慎守川無尋舟之力寧免稽遲苟利涉之惟難雖愆期而必宥地官致詰虛月其憂江郡執言後時可愍然恐事非靡盬辭或憑虛請驗所屆公文而後可遵令典

得丙為縣令教人煮水為酪州司責其煩擾辭云以備凶年

事不舉中有災寧救政或擾下雖惠何為丙念在濟

時動非率法且煩人而不恤是昧烹鮮何歎歲以為
虞將勤煮酪信作勞於無用豈為教之有方必也志
切救災道敷行古周官荒政自可擇其善者新室弊
法焉用尤而效之宜聽責言勿迷知過

得丁為郡守竹縣見昆弟相訟乃閉閣思過
或告其矯辭云欲使以田相讓也

化本自家政先為郡禮寧下庶宜寬不悌之刑訓在
知非是得長人之道况天倫不睦地訟攸興利方競
於膏腴恩難虧於骨肉教宜引古過貴自新雖聞爭

以閔墻有傷魯衛之政庶使愧而讓畔將同虞芮之
風苟無訟之可期則相容而可達推田以讓爾誠謝
於孟光閉閣而思吾何慙於延壽宜嘉靜理勿謂矯
誣

得甲獻弓蹲甲而射不穿一札有司詰之辭
云液角者不得牛戴牛角

貫革車方則宜致詰相角失理亦可徵辭甲奠禮以
戍執蕭而獻中規不撓六材雖則合三捨拔有愆七
札不能穿一宜恐傷人之甲不曰堅乎而非戴牛之

弓無自入也。液信虧於巧者，射遂爽於藏弓。周典足徵，彼自乖於三損。楚君明試，此無愧於二臣。咎且有歸責之非當。

得乙有同門生喪親，將往吊之。其父怒而撻之，使遺縗而已。或詰其故，云交道之難。

予道貴恭，當從理。命交遊重義，蓋恤哀情。孝不在於詭隨，仁豈忘於惻隱。乙父訓乖愛子，道昧擇交。况資益之初，無友不如己者。及居喪之際，凡人猶必救之。既罔念於一哀，是不遵於久要。苟知生而不思，雖贈

死以何為？舊館遇喪，宣父尚宜出涕。同門在戚，玉丹未可忘情。縱申遺帛之誠，豈補贈葛之義。肆一狹之怨，父兮既爽。義方杜三諫之辭，子也亦虧。孝道宜矣，或詰允矣。知言。

得轉運使以汴河水淺，運水不通，請築塞兩河斗門。節度使以當軍營田，悉在河次，若斗門築塞，無以供軍。

川以利涉，竭則壅。稅水能潤下塞，亦傷農。將捨短以從長，宜去彼而取此。汴河決能降兩流，可通財引漕。

運之千艘實資積水生稻梁於一溉亦藉餘波利既相妨用難兼濟節度使以軍儲務足思開實而豐年轉運司以邦賦貴通恐負舟而無力辭雖競競理可明徵壅四國之征其傷多矣專一方之利所獲幾何瞻軍雖望於秋成濟國難虧於日用利害斯見與奪可知

得丙為宰秋雩刺史責其非時辭云旱甚若不雩恐為災

居常授時政則行古恤人救弊道在從宜旱將害於

棗盛雩難拘於秋夏丙象雷是職不雨其憂苟旱鬼之愆時虐既大甚雖葶收之戒序雩亦何傷莫有聞於鶴鳴庶無慮於狼顧馨香以感夕且望於月離稼穡其傷時難遵於龍見雖事畢魯史而義合隨時製錦執言是亦為政塞惟致詰未可與權

得了為郡歲凶奏請賑給百姓制未下散之本使科其專命丁云恐人困

臨邦匡乏情本由哀為國救災義終歸上丁分條出守求瘼居心歲不順成人既憂於二鬴公有滯積戶

百樂天文集 卷之十一 九
將餽於一鍾是輸濟衆之誠允叶分憂之政然以事
雖上請恩未下流稍違主守之文遽見職司之舉使
以未有君命何其速歟郡以苟利國家專之可也卹
貧振廩鄧攸雖見免官矯制發倉汲黯不聞獲罪請
宥自專之過用推共理之心

得友兄為辛所殺戊遇辛不殺之或責其不
佛辭云辛以義殺兄不敢返殺

捨則崇誓報為傷義當斷友于之愛以遵王者之章
戊居兄之仇應執兵而不返辛殺人以義將事刃而
攸難雖魯策垂文不可莫之報也而周官弛禁安得
苟而行之將令怨是用希實在犯而不校揆子產之
誠損志為忠徵史駢之言益仇非智難從不悌之責
請聽有孚之辭

得甲為將以簞醪投河命衆飲之或非其矯
節甲云推誠而已何必在醉

將主軍情酒存人欲推誠之義必在於均飽德之文
不專於醉甲寄分外間令出中權九醞投河義由獨
斷一瓢飲水惠在同霑倘師人之多寒恩逾挾纒如

戰士之載渴功倍望梅分少以表無頗和衆寧宜及
亂豈資滿腹所貴歸心少卿絕甘見稱漢代子反獨
醉寶敗楚軍苟臧否之必由何古今之有異非其矯
節是不知言

得乙有罪丁救以免乙不謝或責之乙云不
為已

在公而行誠非為已懷惠以謝則涉徇私彼既求仁
而得仁此宜以直而報直乙惟獲戾丁乃解紛以為
非罪而拘冶長見稱於尼父直言以免叔向寧謝於
祁奚論恩則丘山不勝在道而江湖可忘况情非私
謁可以不愧于人義在公行實以無求於我合嘉遺
直勿聽責言

得丙妻有喪而於妻側奏樂妻責之不伏

喪則有哀見必存敬樂惟飾喜舉合從宜夫婦所貴
同心言凶固宜異道丙室方在疚庭不徹懸鏗鏘無
倦於鼓鍾好合有傷於琴瑟既愆夫義是棄人喪儼
麻練之在躬是吾憂也調絲竹以盈耳於汝安乎如
賓之敬頗率若徃之哀斯瀆遂使唱和不應憂喜相

干道路見縲猶聞必變隣里有殯亦為不歌誠無惻
隱之心宜受庸奴之責

得甲年七十餘有一子子請不從政詰所由
云人戶減耗徭役繁多不可執禮而廢事

役且有辭信悲懋力老而不養豈謂愛親戀若阻於
循陔恣必興於陟岵顧惟甲子及此丁年戶減事繁
政宜勤於晝夜家貧親老養難闕於晨昏在子道而
可矜雖王徐之宜免事聞諸禮情見乎辭天子敦風
猶勸養其三老庶人從政亦何假於一夫况當孝理

之朝難抑親人之請所由之執愚謂不然

得丙於逆旅食噬腊遇毒而死其黨訟之主
人云買之有處

主不可保死必有因盍知命於喪予豈尤人於食我
丙秋蓬方轉朝薤欲晞旅次爰求將受殮而已生涯
盡當終食之間且非察地之疑自是籲天之戚永言
其黨不察所由死且烏知徒云噬腊之毒買而有處
請無實董之嫌誠虐士之可哀在主人而何咎幸思
怨物無妄罪人

得詔賜百寮資物甲獨以物委地而不拜有司劾其不敬云本賊物故不敢拜

賜表主恩拜明臣禮苟臨事而不敬雖有辭而勿聽甲列在朝行頒其資物宜荷天而受賜何委地而如遺曾是姦賊誠可惡於清德今為寵錫諒難拒於鴻私既為善而迎名亦失恭而遠禮必也志疾貪冒節勵貞廉自當辭讓有儀豈得棄捐不拜况人不易勅鍾離委珠而徒為心苟無瑕伯夷飲泉而何爽宜有孚之効用懲不恪之辜

得乙為大夫請致仕有司詰其未七十乙稱羸不任事

時制未及尚可俟朝疾疹所加固難陳力乙位叅食采志在感事拱以紀年桑榆之光未暮驗其羸病蒲柳之質先零既稱量力而行所謂奉身以退雖髮未種種告老無乃速歟而心既諄諄致政固其宜矣請高知止無強不能

得丙為縣官判事案成後自覺有失請舉牒追改刺史不許欲科罪丙云今式有文

政尚從寬過宜在宥苟昨非之自悟則夕改而可嘉
丙乃案察叅諸簿領當推案務劇詎免毫釐之差屬
褻惟政苛不容筆削之改誤而不隱悔亦可追縣無
罔上之姦州有刻下之虐先迷後覺判事雖不三思
苟有必知勝舉明無二過揆人情而可恕微國令而
有文將欲痛繩恐非直筆

得甲替乙為將甲欲到乙嚴兵守備不出迎
發制書勘合符以法從事御史糾其無實至
之禮科罪不伏

師律貴貞兵符示信苟未會合敢忘戒嚴乙奉中權
甲承後命推輪相代言赴及瓜之期裹甲自防猶軫
剪茅之慮且信惟守器權在隱情符節既未合同軍
衛如何徹警所宜慮遠安可徇私闕於將迎雖率主
禮究其守備是叶軍謀無責建牙恐非直指

得鄉老不輸本戶租稅所司詰之辭云年八
十餘歲有頒賜請預折輸納所由以無例不

許

丹制既登誠宜加惠歲賦不入何以奉公苟希常而

是遠雖移用而不可郡老年參耆耄名繫版圖天賜
未須且有躁求之請地征合納非無苟克之心曾是
徇私固難遠例况時逢恤老節令勤王尚齒肆造我
歲敦於善養食毛入賦爾奚忘於樂輸受賜任待於
時頒量入難虧於歲折不從妄請誠謂職司

得乙女將嫁於丁既納幣而乙悔丁訴之乙
云未立婚書

女也有行義不可廢父考無信訟所由生雖必告而
是遵豈約言之可爽乙將求佳壻曾不良圖入壻之
儀既從五兩御輪之禮未及三周遂遠在耳之言欲
阻齊眉之請况卜鳳以求士且靡咎言何莫鴈而從
人有乖宿諾婚書未立徒引以為辭娉財已交亦悔
而無及請從玉潤之訴無過桃夭之時

得丙請與丁卜丁云死生付天不付君也遂
不卜或非之

聖人建易雖用稽疑君子樂天固宜知命苟吉凶之
罔僭何中否之足詢丁執心不回出言有中爾考前
知之兆誠足決疑吾從昆命之文心先蔽志以為禍

福由已休咎則宜於慎行生死付天倏短乃存乎陰
騭當脫身於木鴈寧問命於著龜言既中倫理亦窮
性况詹尹釋策有問焉知闔庶立言不疑何卜不從
握粟是謂忘筮

得耆老稱甲多智縣司與以理人或云多智
賊也未知合用否

道雖棄智政且使能苟養之以恬則用之不惑甲稱
子智縣舉爾知將老者之審才得賢斯美何或人之
懵理為賊是虞成蔽蕩之無聞庶利人之可取

智殊小大用有否藏識若限於挈瓶或當害物道能
弘於樂水何爽理人請審兩端方從一見

得乙為騎將虜至若涉無人之地監軍責其
無勇略辭云內無糗糧外無犄角

寸晷貴安任候尚警苟不固吾圉則速即爾刑乙登
以於壇鎮于邊壘誠可戒嚴走集罔有敵于我師何
乃啓納寇戎若無人於吾地是昧安邊之略信貽失
律之凶奏勇蔑聞罪戾誰執如或寇強師老食絕城
孤期盡敵而遂且勤於堅守苟知難而退猶愈於覆

亡宜務倚角之辭難議建牙之罪

得丙進柑子過期壞損所由科之稱於浙江

陽子江口各阻風五日

進獻失期罪難逃責稽留有說理可原情丙乃行人
奉施錫貢薦及時之物誠宜無失其程阻連日之風
安得不愆于素覽所由之語聽使者之辭既異違寧
難科淹恤限滄海於夫役匪我愆期敗朱實於厥苞
非予有吝捨之可也誰曰不然

得丁喪所知於野張帷而哭鄰人詰云夫子

惡野哭者

死喪有別哭位從宜情或異於親踈禮則殊於內外
丁義勤交道動循容止未忘半面嘗同傾蓋之歡永
念重泉遂展張帷之哭雖聲非有慟而分止所知未
乖夫子之言何致鄰人之詰如或肆號吽於路左物
或惡之今則具威儀於野中禮無違者允符前志奚
恤斯言

得甲妻於姑前叱狗甲怒而出之訴稱非七
出甲云不敬

細行有虧信年婦順小過不忍豈謂夫和甲孝務恪
恭義輕好合饋豚明順未闕爽於聽從叱狗愆儀盍
勿庸於疾怨雖怡聲而是味我則有尤若失口而不
容人誰無過雖敬君長之母宜還王吉之妻

得乙為軍昧夜進軍諸將不發欲罪之辭云

不見月章

表旗示信戎政貴明在九章而或乖雖三令而惟反
乙是稱戎帥未達軍容奉明罰之辭無聞月建用清
師之計方事宵征徒欲董以爪牙曾不明其耳目以

將經武必在昭文夜既未申有虞固宜不進月章莫
舉毀匱自可當辜訴非實辭責乃當罪

得丙嫁殤隣人告違禁丙不伏

生而異族死豈同歸且非合祔之儀爰抵嫁殤之禁
丙夫婚是恤窀穸斯畢以處子之薨華遷化人之蒿
里曾靡卜於鳴鳳各異室家胡為相以青烏欲同宅
兆徒念幼年無偶豈宜大夜有行况生死寧殊男女
貴別縱近傾筐之歲且未從人雖有遊岱之冤焉能
事鬼既違國禁是亂人倫請徵媒氏之文無抑鄰人

之告

得丁陳計請輕過移諸甲兵省司以敗法不許丁云宥罪濟時行古之道何故不可

軍興事亟則務益兵時泰殺成固難敗法丁志崇陳計識昧相時當兵戢之朝詎資凶器在刑行之日寧利幸人是廢國章欲崇軍實福禍續武弊起惠庶有罪未若慎刑濟軍不如經國况王霸道異古今代變小戎管氏之器曾足行權哥矣省司之言孰非經久得失斯在用捨可知

得甲在獄病久請將妻入侍法曹不許訴稱三品已上散官

獄雖慎守病則哀矜苟或無寥如何罔詔甲罪極刑憲身後幽繫憂能成疾膏肓之上未痊危則思親縲絏之中有請勢窮搖尾念切齊眉卧或十旬既軫彌留之懼官雁三品宜從侍執之辭敢請法曹式遵令典

得乙聞牛鳴曰是生三犧皆用之矣問之皆信或謂之妖不伏

上稟天性旁通物情是謂生知孰云行恠况形雖異類心則同歸四鳥分飛聽音既稱有信三犧皆用聞鳴豈可為妖且叶前言殊非左道爾惟不講我則有辭揆以周官業將同於夷肆詳夫魯史責不及於葛盧獸語可徵人言奚恤

得丁母乙妻俱為命婦每朝參丁母云母尊婦卑請在婦上乙妻云夫官高不合在下未知孰是

肅恭成德卑則敬尊著定辯儀賤無加貴眷彼母妻之品視其夫子之官敬將展於君前禮且殊於門內閨閫垂訓長幼雖合有倫朝廷正名等列豈宜無別婦道雖云守順國章未可易班母則失言妻唯得體且子兮位下尚欲宗子而夫也官崇如何卑我請依序守無使名愆

得丙請預駙馬所司糾云景庶子也且違格之欲科家長罪不伏

冒婚徼倖既抵官刑罔上失忠亦虧臣節在幼賤而不禁豈尊長之無辜屬下嫁王姬旁求都尉選吹簫

之匹雖則未獲真人預傳粉之郎豈可濫收庶子况
姻連天族榮冠人倫嗣既異於承祧禮難當於釐降
掩藏庶孽唯慮其不諧叨冒寵榮詎思於有罪豈非
或益而損曾是欲蓋而彰國章寧捨於面欺家長宜
從於首坐

得甲夜行所由執之辭云有公事欲旦趨朝
所由以犯禁不聽

趨朝有時則當蚤作防姦以法寧縱晨行雖夙夜之
自公豈警巡之可犯甲陳力是念相時斯昧方鳴三

鼓知行夜之猶嚴未闕九門信將朝而尚旦趨進合
遵於辨色夙興宜伺其啓明既爽時然後行是必勤
而有悔非巫馬為政焉用出以戴星同宣子侯朝胡
不坐而假寐宜遵街禁用表司存

得郡舉乙清高廉使以為通介無常罪舉不
當郡稱徃通今介時人無常乙有常也

退藏守道自合銷聲待用濟時則難背俗乙行藏未
達通介不常若德至而無稱固當滅跡既名彰而見
用自合隨時待立身以清高且於物而凝滯無固無

必當從宣尼之言獨清獨醒信貽漁父之誦承順已
隨於流俗全真未事於同塵宜從不當之科俾使無
常之察

得丙於私家陳鍾磬鄰人告其僭

器不假人易而生亂樂惟節事過則有刑禮既異於
古今法且禁其鍾磬是苟求節略罔念速尤竊拘業
以陳樂由奢失惟金石而奏難以聲聞雅當犯貴之
辜難許徹懸之誦然恐賜同甄絳借異丁奚是彰北
闕之恩何爽南鄰之繫是殊國禁無告家藏

得丁氏有邑號犯罪當恕請同封爵之例所
司不許辭云邑號不因夫子而致

邑號旌賢國章議貴如或不能自庇則將焉用其封
丁氏降恩闔門罪羅邦憲寵非他致既因表以勲賢
咎雖自貽亦可免於刑戮若不從其寬恕則何貴於
虛封漢恤緹縈猶問贖父齊分石窳豈不慶身宜聽
輯矣之辭難奪贖号之請

得丙與乙同賈丙多收其利人刺其貪辭云
知我貧也

仁無貪貨義有通財在潔身而雖卑於知己而則可
丙乙竒贏何業氣類相求競以錐刀始聞小人喻利
推其貨賄終見君子用心情表深知事符徃行如或
貧富別類自當與讓立廉今則有無相懸固合損多
益寡是為徇義豈曰竭忠受粟益親孔氏用敦吾道
分財損已叔牙嘗謂我貧無畏人言俾彰交態

得景夜越關為吏所執辭云有追捕

設以關防辨其出入既慎守而無怠豈偽遊而能過
丙勤恪居懷夙夜奔命以謂寇攘事切宜早圖之聞
思呵察戒嚴不可踰也崔蒲乃司敗小事襟帶實國
家大防仰老氏之文雖知善閉稽周公之制尚曰不
征責已具於有司理難辭於靡盬盍從致詰無信飾
非

得乙以庶男冒婚丁女事發離之丁理饋賀
衣物請以所下聘財折之不伏

婚以匹成嫡庶宜別訟由情察曲直可知將令人有
所懲必在弊之不及相時庶嬖冒乃婚姻情以矯誣
始聞好合事欺彰露旋見佻離既生無恥之嫌遂起

納徵之訟辭多執競理有適歸乙則隱欺在法而聘財宜沒丁非罔冒原情而饋禮可追是非足明取與斯在

得乙在田妻餉不至路逢父告飢以餉饋之乙怒遂出妻妻不伏

象彼坤儀妻惟守順根于天性父則本恩饌宜進於先生饁可輟於田畯夫也望深鎮日方期相敬如賓父兮念切囂然旋聞受哺於子我雖幸於齊體孝則見於因心盍嘉陟岵之仁翻肆送稽之怒孰親是念難忘父一之言不爽可徵無効士二其行犬馬猶能有養爾豈無聞鳳凰欲阻于飛吾將不取

白樂天文集卷之二十一



白樂天文集卷之二十一